

Ríos + Rede Natura

Roteirrío 08

Roteirrío é un programa de itinerarios organizado polo Proxecto Ríos que pretende unir ríos e persoas. Continuamos coa andaina iniciada o ano pasado tentando achegar os cursos fluviais á cidadanía nun ambiente lúdico, así como dar a coñecer o patrimonio natural, cultural e social asociado.

Roteirrío 08: Ríos + Rede Natura

Na edición de 2008 imos achegarnos a ríos que estean incluídos na Rede Natura, para coñecer os seus valores e as súas ameazas. Galiza, o país dos mil ríos, agocha un patrimonio fluvial extenso e diverso que merece ser coñecido e posto en valor. Son numerosos os ríos que polo seu valor dan nome a un LIC, ou os espazos fluviais que forman parte dun conxunto de ecosistemas e pertencen á rede de espazos protexidos. Como mostra, os tres que imos coñecer.

Aquen vai dirixido?

Roteirrío vai dirixido a toda a cidadanía, tanto aos participantes no Proxecto Ríos como a aquelas persoas interesadas en coñecer o noso patrimonio fluvial. Nos roteiros poderán participar maiores de idade ou menores acompañados dalgún familiar.

Prazas e preinscrición

As prazas para os roteiros son limitadas, ao entendermos que un grupo reducido axudará a coñecernos mellor, facilita o achegamento á zona e causa un menor impacto no espazo visitado.

Custo

O Proxecto Ríos financia unha parte dos roteiros, sendo 6€ o prezo a desembolsar polos participantes.

Programa

Todos os percorridos realizaranse en autobús. A saída está programada ás 9:00h da estación de Santiago de Compostela, e a hora de chegada será á tardíña (pódense mudar horas ou, en caso de mal tempo, adiar algunas das datas). Na web do Proxecto Ríos iremos informándote das actividades, puntos de encontro, mapas do percorrido, etc.

E necesario levar comida, auga, calzado cómodo e... un sorriso.

Se queres participar inscríbete
e envianos a túa solicitude a:

Proxecto Ríos
Travesa de Basquiños, 9 Baixo
15703 Santiago de Compostela

Ou ben na páxina web, por correo electrónico
ou por teléfono:

www.proxectorios.org
viqui@adega.info
Teléfono / Fax: 981 570 099
Móbil: 650 261 283



Organiza:



Financia:



Roteirrío 08



LIC Río Tambre

8 de Marzo



Neste primeiro roteiro de Roteirrío 08 visitaremos o LIC Río Tambre, espazo cunha superficie de 583 ha e unha altitude media de 261 metros. A conca deste río é unha das maiores de Galiza, cunha extensión de 1530 km². Moitos regatos verten as súas augas ao Tambre, sendo os seus afluentes más importantes os ríos Barcala e Dubra. O río Tambre ten dúas zonas en Rede Natura 2000, unha localizada na zona de Esteiro, na ría de Noia, e outra no curso medio-alto, que é a que imos visitar.

No percorrido que imos realizar poderemos contemplar unha das zonas de ribeira mellor conservadas do noso territorio, con bosques de ameixeiro e freixo, fragas de carballos galaico-portugueses e matogueiras con especies endémicas e lagoas naturais eutróficas. Poderemos ver, se temos sorte, a lontra, o gabián e mais o picapeixe.

LIC Parga-Ladra-Támoga

26 de Abril



O espazo natural lugüés Parga-Ladra-Támoga ocupa unha superficie de máis de 4.900 ha da conca alta do Miño, onde os cursos fluviais se mesturan con diversos tipos de zonas húmidas, bosques mesófilos e paisaxes agrícolas tradicionais, orixinando un espazo de gran valor ambiental e cultural que obtivo o recoñecemento da UNESCO converténdose en Reserva da Biosfera no ano 2002.

Os hábitats más salientábeis que podemos atopar son entre outros as augas oligotróficas, ríos de chaira, uceiras húmidas atlánticas, turbeiras de cobertor, bosques aluviais de ameixeiro e freixo, etc.

Neste percorrido poderemos apreciar o cardo de ribeira (*Eryngium viviparum*), así como diferentes especies animais como a lontra ou o sisón. Ademais, este lugar alberga arredor de 1.500 aves acuáticas durante o período invernal nos seus terreos asolagados asociados a pasteiros.

LIC Macizo Central

24 de Maio



O LIC Macizo Central ocupa unha superficie de 46.983 ha e acolle un dos cumios más altos do país, Cabeza de Manzaneda, con 1.780 m. Trátase dun conxunto de serras nas que destacan os pasteiros de alta montaña e onde, debido á súa baixa densidade de poboación, nos achegaremos a unha natureza espectacular vixiados polo lobo, o bufo e a aguia real. Na actualidade estase a traballar na creación do Parque Natural Macizo Central, que albergaría tamén a serra do Invernadoiro, e o convertería no parque máis grande do país.

No percorrido gozaremos dun río da alta montaña ourensá, coas súas peculiaridades, augas frías e cristalinas onde descubriremos un tipo de ranúnculo propio destes ríos (*Ranunculion fluitantis*). Este espazo alberga tamén unha vexetación única en Galiza como a xanzá, o afroixón ou o esfagno, e nel habita o muraño.